



DEO OPTIMO MAX.  
UNI ET TRINO,

VIRGINI DEIPARÆ, ET S. LUCÆ,  
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS  
*manè discutienda in Scholis Medicorum, die Veneris duodecimæ  
Maii M. DCC. XLI.*

M. JOANNE-BAPTISTA DE DIEST,  
Doctore Medico, Præside.

*An redeunte Vere citò redeat Convalescenti sanitas?*

I.



RÆCIPITI cursu labuntur tempora; rapido  
solis motu metiuntur & dies & horæ: hujus exacto  
celeriter orbe revolvitur annus. Sed hic dum fugam  
properat, unus non est illius tenor. Sol etenim à quo  
demanant vitæ flumina, easdem terræ regiones beni-  
gno non semper recreat aspectus: hinc pro variis anni  
temporibus variæ apparent universi facies tempestatum nomine de-  
signatæ. Ast harum cœli mutationum impatiens non est viventium,

genus, diversas quoque subit vicissitudines, diversis afficitur modis. Ætas fervida cuncta corripit, aret ager, sitientes moriuntur herbe. Tum in scenam prodit Autumnus insalubris, qui humiditate & inconstantia ferax, quas ingenti cum apparatu è gremio deprompserat & ostentaverat opes natura, abripit & dilacerat. Mox aspera regnat Hyems; rigent arva, penetrabile frigus adurit plantas, nullæ aut herbe campis apparent aut frondes arboribus, latet informis humus aggeribus nivis & alto gelu sepulta. Tandem solvitur acris Hyems gratâ vice Veris & favoni, nec prata canis albicant prunis. Jam redeunt grata Veris tempora. Sol tepenti lumine rigentes refocillat terras, convalescit natura, ex hilaratur, repuerascit.

## I I.

**V**ERE novo qui modo lugebat, nunc ridet universus orbis. Quæ gelu indurata squallebant terræ, nunc lætis distinguuntur coloribus. Non alios primâ crescentis origine mundi illuxisse dies, aliumque habuisse tenorem credideris... mundi natalia festivis diebus naturam celebrare diceres. Luxuriat omne vegetabilium genus. Exultant omnes animalium familia. Vere alma Venus colitur, Venerem genus omne volantum sentit... Vere tument terræ, genitalia semina poscunt. Tum Pater omnipotens sacundis imbribus, æther, conjugis in gremium lætæ descendit & omnes, magnus alit magno commixtus corpore fruges. Avia tum resonant avibus virgulta canoris. Parturit almus ager zephyrique tepentibus auris laxant arva sinus... inque novos soles audent se gramina tuto credere, nec metuit surgentes pampinus austrós, sed trudit gemmas, sed frondes explicat omnes... & lætæ textunt umbracula vites... Vere novo lætis pubescunt floribus arva... floret odoratis terra benigna rosas... tunc omnis ager, tunc omnis parturit arbor. Tunc frondent silvæ, tunc formosissimus annus.

## I I I.

**N**ON minori cum imperio in hominum corpora dominantur tempestatum vices: suos quoque patiuntur affectus. Delicatiorem illorum fabricam inclementis cœli viribus resistere parem ne credas. Æstare igneus calor urit præcordia & artus depascitur, fibrarum remittitur tonus, perit sua fluidis consistentia, subtilis nimium rariorque sanguis vetitos & devios lymphæ canales errando subit & longius progredi impotens stagnat, corrumpitur, sic grassantur inflammatio, gangræna, sphacelus. Nimio æstu evolvuntur humorum principia, acredinem concipiunt, vasa corrodunt & irruant; hinc febrium putridarum terris incubat cohors. Humidâ Au-

tumni temperie madefactæ resolvuntur fibræ. Humore jam satis imbutus aër humidus corporis halitus agrè & invitus excipit. Hinc præpeditâ perspiratione effectisque fibrarum viribus vitalis languet motus, tabis, hydropis, melancholiæ infelix prodromus. Exhalanda materies modò hærens in vasis duro partes excruciat rheumatismo: modò quâ data porta ruens vergit ad intestina dysenteriam, diarrhœas excitatura. Adest Hyems: frigore rigescunt fibræ, condensantur humores, præcluduntur cutis spiracula. Quid inde? furit tempestas periculorum plenissima; serosa aggeritur colluvies, quæ intra vasa coercita sævit. Coryzâ & gravedine nares, fauces raucedine corripit, bronchiorum glandulas infarciendo pulmones tussi fatigat, ipsius halitibus præcludendo vias aut dolosam invehit peripneumoniâ notham, aut pulmonarem phthisim clam serpentem suscitât, articulos torquet doloribus. Jam verò quis te tantis agitatum procellis excipiet portus? certam ex Veris reditu salutem expecta, nec spem Convalescentis decipiet dudum cognita erga omnem naturam Veris benignitas & clementia.

## I V.

**E**RGO-NE dum redeunte Vere omnis reviviscit natura, solus homo frigesceret? Eð-ne devenit gentis humanæ calamitas, ut dum aliarum tempestatum injuriis, gravissimis multatur affectibus, illius tempestatis quæ omnium benignissima est, non recrearetur adventu? levia quæ convalescentem stipant symptomata, renascentis Veris facilè parebunt imperio capeſcentque fugam. Convalescentem exercent fastidiosæ morborum proles languor & tædium: vires votis impares ipsum sæpè defraudant, ambulaturus procedit? Subripiunt se se corpori pedes: thalamo decumbentem somnus diu fugit; efflagitatos respuit cibos: expostulata amicorum colloquia imbelles fatigant aures: sed in tenui res est. Macste animo, & cuncta Veri perficienda committe. Vere quem inspiras aër, non nimio infectus humore, sed benigno rore madens rigentes emollit fibræ; concretos eliquat humores; frigore nec pulmonis nec cutis spiracula constringuntur: avolantes non reprimuntur particule nec nimio calore retinendæ dissipantur. At tepido Veris calore humores fluxiles evadunt, non nimium rarefacti: flexiles redduntur fibræ, non resolvuntur. Referantur incernicula; viget secretionum opus, inutiles noxiæque partes foras amandantur; jam defæciator sanguis spiritus animales non ut ante, vappidos & effectos parcè subministrat, sed vividos, sed generosos qui affatim & copiosè in omnes corporis partes influentes ipsas vitali motu perfundunt, & exoptatæ sanitatis reddunt participes.

**N**EC fatis. Id omne aut dulce aut utile quod in omnem naturam benigna refundunt Veris tempora, in hominis Convalescentis emolumentum cedit. Innubila cœli facies puroque ridens lumine, pulsus aquilonibus lenè spirantes zephyri Convalescentis exhilarant sensus, animumque blandè afficiunt. Campi herbis & floribus latè gratum odorem spargentibus variegati balsamicis halitibus salubriorem efficiunt aëris usuram. Convalescentem piget de die in diem domi stare: Audet patenti se committere aëri; crastinâ die citius exiturus tecta subit quasi invitus; mox omnia delibatus exercitii commoda, esurit: arridet palato cibus: juniores herbæ non grave stomacho facefcunt negotium: animalia delicatioribus suavioribusque alimentis pasta delicatiorè & suaviorem suppeditant succum. Tum lectocomponitur: ultrò somnus advolat, & altâ quiete profundit artus. Sic suæ ipsi citò restituntur vires. At morbi tenaciores reliquæ hærent corpori: ipsas quoque Ver excutiet: si totum tabe fuerit affectum corpus aut pars aliqua graviori labe tentata, vacca, capræ, asinæ ubera Pharmacopolarum pixidibus poriora Vere porrigunt: si crassior lentescensque sanguis aliqua infarserit viscera: aquæ ab ipsâ naturâ medicatæ, quibus cum reduce Vere redit energia, votis cumulum addent. Sed ne nos Veri nimium blandiri putes; sui sunt & Veri morbi, sed ni speciali miasmate inficiatur aër, plerique salubres habendi; sæpè etenim sunt naturæ conamina quæ nedum lædant naturam, ipsam expediunt.

*Ergo redeunte Vere citò redit Convalescenti sanitas.*

Proponebat Parisiis, JULIANUS BUSSON, Dinannæus  
Macloviensis, Baccalaureus Medicus, A. R. S. H. 1741,  
à sextâ ad meridiem.